

J. DAN. MAIORIS,  
Phil. & Med. D.

HISTORIA ANATOMICA  
**CALCULORUM,**

Insolentioris Figuræ, Magnitudinis  
ac Molis, in Renibus Clarissimi Philosophi, J. Sper-  
lingii, reperorum.



LIPSIAE,

Impensis JOHAN. BARTHOL. OEHLERI, Bibl.

*Excudebat* JOHAN-ERICUS HAHNIUS.

A. C. 1662.



J. D. M. A. 1812  
The 1st of

HIS MAJESTY

CALIFORNIA

Information  
The 1st of

THE 1st of

1812

THE 1st of

THE 1st of

THE 1st of



VIRO

*Nobilissimo, Amplissimo, Clarissimoq,*

DN.

D. JOH. MICHAELI,

*Hæreditario in VENDORFF/*


Academiae Lipsiensis Prof. P.

& Decano, nec non Archiatro Saxo-Alten-  
burgico, eminentissimo,

S. P. D.

A U T O R.

*Magnifice, Nobiliss. Ampliss. & Excellentissime*  
*Vir, Dne ac Fautor honorande:*



On Heroibus aut Principi-  
bus offero hunc discursum, sed  
celebratissimo T. nomini inscri-  
bo. Ut enim Jctis Forensia, sic  
Medicis Medica debentur. Quo-  
rum doctrina sanè ante Hippocra-  
tem vix Scriptis edebatur, sed tan-  
quam Divinum quid à Diis pri-  
mùm exerceri, inde à Phæbo ac

Æsculapio ad humanum genus, maximè verò Asclepia-  
darum familiam oretentis propagari, eiqve quasi per ma-  
nus tradi credebatur. Ex hac familiâ natus erat Hippocra-  
tes, medicus Græciæ ter maximus. Tantus certè, ut ipsum



Helmontius, contemtor aliàs Veteris Medicinæ, non dubitet, Adepti nomine, h. e. cui Universalis medicina cognita fuerit, vel, qvi solus inter Antiquos veras & radicales omnium Morborum causas & genuinum curandi modum sciverit, salutare.

Iste Hippocrates veluti primus aut semel Medicinam literis consignasse dicitur, ita scribendi licentia continuo post hunc ad seqviores omnes omnium seculorum Medicos est delapsa, traducentibus eam, prout decet, partim ad honestam Ingenii sui aut laborum ostentationem, partim ad commodum, Posteris pro virili conferendum. Præter qvos duos scopos nescio quàm intima me cumprimis in Te officiositas commovit. Te, inquam; sed qvem Virum? qvem Principum Personarum Medicum, & Principem Medicorum eqvidem non difficilè, Parentem tamen & Hermetem Jätricæ plebis non injuriâ mallem dicere, si merita in hanc, & in Remp. literatam, tot annis collata æstimem, aut, quæ indies adhuc in utramque partem confers.

Qvot enim Aureorum, non Centenarios dico, sed Myriades, ab aliquot lustris jam, cōstanti nisu, pro amplificando magis magisque Laboratorio Chymico, Augustâ prorsus & curiosâ efficacissimorum Medicaminum fabricâ illustri, hætenus non profudisti! Cujus loci parietes non clausos invideñe tenere soles, sed pervios toleras tam Filiis Artis Tuæ, ac Studiosæ Juventuti, quàm aliis etiam, qvi tam prudens ac liberale Institutum Tuum sedulò admirantur.

Quantos, ac qvot sumtus non expendis pro comparando, ac inferendo in Bibliothecam tuam, qvïcqvíd quocunqve modo ad Medicinam spectans, passim qvotidie in Lucem prodit, ut Manuale haut sit, non Liber mediî ordinis



nis aut molis, non opus tandem regium aut Tricubitale, cujus impressi, atqve, ut sic dicam, calentis ab incude adhuc, commeatus, continuo non transeat ad Musæum Tuum, verum Medicorum Vaticanum, veram Æsculapii ac Phœbi sedem.

Ubi situm sanè dein non patiuntur Libri, aut desidi ocio condemnantur; sed vigili oculo & attentâ mente quemadmodum à Capite ad Calcem pervolvuntur; sic, qvæcquid annotatu in iis dignum obvenit, judiciosè ac dextrè, à conductis hanc in rem Synergis eruditis, in Adversaria & Indices remissorios transfertur, tanquam Arbores transplantari solent, posteris profuturæ. Vera dico, nec verbum rei addo.

Qvâ ratione porrò Commercii illius Epistolici Amplitudinem satis prædicabo, qvòd Tibicum præclarissimis Germaniæ, Galliæ, Italiæ, Angliæ, Batavii, aliarumqve Europæ Provinciarum, immò & extra Europam, Medicis intercedit, ut dies haud effulgeat, qvâ unæ aut alteræ literæ à publicis Regionum aut Urbium Tabellariis Lipsiam ad Te non perferantur, velut ad Oraculum. Qvos Cursores aliis vicissim atqve aliis Responsoriiis continuo fatigas solo eo fine, ut publicè consiliis prosis, qvorum energiam ac vim ipsâ Medendi felicitate, privatim in cubilibus ægrorum, passim ad stuporem probas.

Et, qvòd palmarium tandem Medici periti decus est, non cryptologus in Cathedrâ publicâ es, non Arcana repas, non invidè dotes tuas condis, aut iniquâ spe Lucri traheris; sed fideliter, ac gratis sæpe Auditorum Tuorum desideriiis usqve adeo affulges, ut reportent commodi plus, qvàm gratiæ rependant.

Expertus qvâdantenus ista loqvor, nec diversum unqvam Te offendi, qvândiu elapsis annis, etiamsi men-



ses tantum aliquot, ab Ore Tuo hæsi; ut non pudeat me etiamnum, TE non Doctoris amplius, sed Patris instar quodammodo honorandi. In cuius iusti Affectus memoriam, ne nihil interim meritis Tuis compensetur, ecce Historiam quandam Anatomico-Medicam Tibi, talium peramanti, offero, enixè rogans ut benevolâ, quâ clares, fronte, illam accipere ne dedigneris.

DEUS Magnificentiam T. servet, concedatque clemens, ut non innumeris solum decumbentium Aegrorum Familiis, tanquam salutiferum sidus, porro affulgere, sed proprio etiam floridæ senectutis exemplo edocere queas, non posse illum gloriosè aliis mederi, nisi qui Ipse sit Longævus. Vale. Scrib. Wittebergæ, d. 26. Febr. st v. 1662.





# HISTORIA ANATOMICA.

**Q**uam admirabilis sit structura Renum, quantam solertiam Natura impenderit in Fabricâ eorum, tum ex scriptis Anatomicorum passim liquet, inter quorum Principes meritò quidem hac ex parte statuimus Medicum Prussiae clarissimum, JOH. LOESELIIUM, tum ex Autopsiâ imprimis est petendum.

*Renum Fabrica admirabilis.*

Sive enim Parenchyma illorum consideres & vasa, peculiare prorsus id, & bicolor intus est, venulisque & arteriis plurimis, non minus, ac ipsa Epatis, Lienis, Pulmonum, dicam & Cerebri substantia intertextum, ut debitus ipsis hoc pacto influat alimenti gurgis, vel abundantior ad Cor redundet.

Sive connexas in sinu eorum carunculas verrucosas & veluti papillares adspicias, gratâ candoris specie albicantes etiam ex his argui potest insignis quædam Naturæ sapientia, quandoquidem hæc glandulas illas sive pro evacuandâ segregandaque ex sanguine colluvie serosâ, sive pro stabiliendis Renum cameris & distinctis ibidem laterum, veluti tubulorum ab Ureteribus productorum divaricationibus effinxit, ut commodius hoc pacto ab his tanquam ex pelvi quâdam, infernè per aperturam veluti per infundibulum, indeque per Ureteres, tanquam Tubulos quosdam ac Aquæ ductus, in Vesicam non secus atque in lebetem aliquem aut foveam, serosus Massæ sanguineæ latex, veluti liquor, destillantæ Aquæ, derivetur, & commodè postea per meatum Urinariū, tanquam per appendicem, aut caniculum, sed recluso prius ad arbitrium Sphinctere, velut Epistomio, emittatur. Ut alia huc spectantia non attingam, quæ summam quemadmodum Naturæ Architectricis solertiam, sic Directoris ipsius DEI Benignitatem & inexhaustum Providentiæ Oceanum, in ingeniosâ istiusmodi Renum, veluti Fontis alicujus aut Hydropægnii, fabricâ attestantur.

*Hydropægnis comparatur.*



*Renum pathemata varia.*

*Præcipue Calculi :*

*Quibus obnoxius fuit Cl. Sperlingius,*

*isq; insolentioribus.*

*Calculi in variis corporis partibus.*

Eorundem proinde Consideratio quo justius unquam admirabundos Animos in se concitavit eò magis dolendum est, postquam ex Inobedientiæ primæ culpâ Immortalitas hominum Mortalitate est damnata & corpus nostrum aliis quibuscunq; ærumnis obstrictum, tam nobiles ejusdem corporis Partes ne ipsas quidem ab ægritudinibus omnimode exemptas esse, sed diris quam sæpe exagitari, (penes Adultiores præcipue) Morbis & eorum causis tam atrocibus torqveri symptomatum insultibus, ut Hominem credas totum in Dolores versum à calculis quam maximè, partim in Cavitate Renum hærentibus, partim per exsertos Ureterum Canales, sed irritò interdum Naturæ stimulo transitum sibi quærentibus unde Tensio, & Dolor, Affluxus Humorū ac Inflammatio, Febris, Vigiliæ, Deliria, Vomitus, Urinæ suppressio, periculum suffocationis, Virium jactura, & ipsa tandem Mors.

Illustre hujus rei, sed funestum exemplum Anno currentis Seculi quinquagesimo octavo, die XII. Mensis Augusti, experiri hic VVittebergæ fuit in celebratissimo Philosopho, Physicorumq; cum primis, dum viveret, Phosphoro, summis laudib; illustri JOH. SPERLINGIO. Hic, quâ patientiâ vicerit, acerbissimos quantumvis Renum & Lumborum dolores, quam propriâ sibi h. e. compositâ Mente pertulerit aliquot retrò annis, tam atrocem ac lentam Mortis suæ causam, supra facundiam hic, & quodammodo præter scopum est.

Calculi tamen ex Corpore ejus à me extracti, & feriens identidem animum meum, utut elapso jam plusquam Triennio, observationis istius Memoria, addo & justus in piè defunctum cultus, id effecit ut mori imposterum haut sinerem qualemcunq; etiam ejus rei Historiam, sed quantum in me est sedulò eandem ad Posterōs propagarem, imprimis, quod calculi isti tum Magnitudinis & formæ, tum abundantia simul essent insolentioris.

Missis proinde jam ambagibus nimis, Misso calculorum alioqui præter Renes Ureteres aut Vesicam subjecto, sive in cerebro etiam, palato, ac sub lingvâ, sive in auribus, oculis aut palpebris, gutture prætereâ, mammis aut corde, sive in pulmone aut epate, ejusque cysti Felleâ (cujus rei exempla vid. apud Clariss. D. JOH. DANIEL HORSTIUM, Manud. ad Medic. p. m. 104.)

sive



sive in splene tandem aut ventriculo, in Intestinis (vid. HENR. RUFUM obs. 4. apud RIVER. obs. communicat. p. 338.) in mesenterio, testibus, scroto, pene (vid. HENR. ab HEER obs. 7. Spadan. ab Ampliss. Dn. D. JOH. MICHAELE edit. pag. m. 113.) Utero, juncturis Articulorum, ipsis etiam Musculis ac Nervis (vid. eundem Rufum obs. 5. ibid.) Membranis (vid. Tulp. l. 2. obs. 48.) Venis verò præcipuè ac Arteriis aliisque partibus quamplurimis quas studiosissimè magnus noster D. SENNERTUS (lib. 2. Instit. Med. parte 2. c. 9.) profecutus est, nasci soleant.

Missa ferè etiam eorundem materiâ, & modo succrescendi, *Eorundem*  
an intercedente aliquo glutine enascantur (quod mordicus impu- *Materia.*  
gnat HELMONTIUS d. Lithiasi c. 2. §. 20.) atque rectene, an mi-  
nus materia Calculorum Tartarus vocetur, de quo equidem non  
litigo, cum bellum de verbis haut facilè sustineam, aut planè in  
genere, unde nata sit Fœculentiæ Tartareæ appellatio, cui Ety-  
mologiæ ex professio satisfecit Nobiliss. D. PHIL. JAC. SACHS  
(Ampelograph. Curios. sect. 9. c. 2. p. 584.)

Missaque tandem ferè quod potissimum tamen alicui videri  
possit, Causâ Effectrice an calculi scilicet à calore sive Renum, si- *Efficiens an*  
ve aliorum viscerum limosas sanguinis partes forma sedimenti in *Calor?*  
Renibus, per modum sive fixationis sive præcipitationis relictas,  
coquente, assante & consequenter, per resolutionem humiditatis  
indurante, an à frigore easdem congelante, an planè à spiritu *Vel frigus?*  
quodam, Sale aut Aurâ lapidificâ, non tam Renibus aut aliis par- *Vel*  
tibus quam ipsi Fœculentiæ sanguinis & materiæ Calculorum ra- *Aura lapidi-*  
dicaliter inhærente, producantur; quod posterius sanè simplici- *fica?*  
ter negari nequit, si certos salium in chylo & sanguine hærentium  
status & energiam perpendamus, prout fusius hoc in præconce-  
pto jam pridem à me Lithologiæ, quam meditor, Curiosæ sive de  
Animalibus & Plantis, Animaliumque partibus & quæ ad plantas  
spectant, in lapidem verè & realiter conversis, complemento,  
rationibus partim, partim exemplis, & ulteriore historiarum fide  
nec non conjecturis quibusdam ex triplici Naturæ, vocatoque in *Calculi formes*  
subsidiu Chymicæ Artis Regno, petitis cum DEO declarabo, *in sanguine.*  
probaturus, hære in ipsis, quæ nos rigant, Venis, inter liquidos  
purpuræ sanguineæ Fluctus, & ob inquinatas semel resoluti intra



*Exemplo To-  
phorum in  
Aq̃vos.*

*Saxeæ Mon-  
tium pedes  
unde?*

*Succi Fossiles  
concreti.*

*Spuma Toph-  
aceæ Fontis A-  
ponensis in  
agro Pat. Vi-  
no.*

ventriculum petroso alimentorum sale chyli partes, deferri per corpus sursum ac deorsum haut rarò fomitem exitialis Tartari & faxeos catarrhos, haut aliter, ac Rivi Metallici passim, Mineræ, à quâ eruperunt, indolem secum fuerunt, & ejusdem ope, pro variâ inhærentium nunc volatilium nunc fixorum salium activitate & corporum dispositione, vel plantas ac animalia corripunt, occupant, destruunt & in lapidem convertunt, vel forinsecus minimum Tophaceam ipsi Crustam & vestem semisaxeam inducunt ob adhærentiam videlicet limi tenerrimi, cujus humiditas dum transpiravit, sive leviter tantum compactæ & admodum friabiles, sive concretæ magis & utcunq̃ve crysalli satæ, siccæ certè ac duriusculæ relinqvuntur, sic, ut planè faxeos Montium pedes reddi rivusq̃ve ipsis allabentes variis lapillorum generibus repleti, vix aliunde suspicetur MARTINUS SCHOOCK ( de Turffis c. 5. p. m. 27. )

Id quod de succis plerisq̃ve Fossilibus præsertim verum est, qvi per successivam partium accretionem, intra vel supra Terram emergunt, & cumulantur mediantibus Aq̃vis, quæ variè per Montium cryptas & salebras discurrunt, vel per occultos Terræ poros in aliq̃va ejus concava transudant, aut alibi, formâ spumæ cujuspiam erumpunt.

Tales sunt Tophi illi candidi, striati & scabri, quales al Abano, non procul Patavio, meridiem ejus versus, antiqvi fontes Ebani, Aponenses, vel Abani, Patriâ PETRI APONENSIS clari in confinio montis Ruæ & collium Euganeorum, etiamnum continuo scaturiginis fervore ad margines deponunt, ipso jam olim CLAUDIANO teste ( Epigram. d. Apon. )

*Nullum cum strepitu madidis infecta favillis*

*Despumat niveum fistula cana salem;*

Suntq̃ve ejusmodi Frustrula, spumæ illæ Thermæles, bellè admodum virgatæ ac striatæ, veluti multiplicia quædam germina faxeæ candicantia sibiq̃ve arctè complicata dixeris. Agglutinanturq̃ve marginibus Terræ, non confertim, sed sensim, quia in minimas atomos prius sunt solutæ: hinc nec ipsam, quâ eluuntur aquam ulatenus turbidam reddunt, sed limpidissima hæc à fonte suo derivatur ad longinqua, in quorum convalle alicubi tantopere fluctibus



quibus augetur, ut rotam molendini circumagat, ad stipulante  
 Dn. D. CHRISTIANO LANGIO (d. Thermis Carolin. c. 3. §. 32.)  
 observavitque proinde Cl. VVEPTERUS (d. Apoplex. p. 207.)  
 rotam etiam hanc topheo candido obduci, dum ita ait: *In agro A-*  
*ponensi vidi, à Thermarum aqua ad sensum limpidissima ac purissima Ro-*  
*tam Molarem, quam versabat brevi tempore undiquaque, densissimo candi-*  
*cantelapide, unciarum duarum crassitie incrustatam fuisse, quem alternis*  
*mensibus molitores ceu in opera sua remoram, dedolare cogebantur. Immo*  
*planè ab iisdem aquis in saxum conversam muliebrem mam-*  
*mam HEURNIUS se vidisse asserit Method. ad Prax. (tit. lutum*  
*Thermar. p. m. 29.) cum quo conferatur HENRIC. ab HEER,*  
*(Spadacren. c. 2. p. m. 18.)*

*Rota Molendi-  
 ni Topheo ob-  
 ducta.*

*Mamma mu-  
 liebris petre-  
 facta.*

Similem in modum in Germaniâ etiam nostrâ passim, præ-  
 cipue verò in Thermis Carolinis sabulum nunc magis, nunc mi-  
 nus candicans, flavescens aut rubicundum formâ erosorum den-  
 tium, marginibus parietum adhæret. Atque licet fontes, qui  
 præterea in Spâ & Leodii habentur, actu potius frigidi sunt, quâ ca-  
 lidi, HENRIC. ab HEER (Spadacren. c. 7. p. 51) referente; unde  
 cum aciditate, quam junctam habent, à misturâ chalcanti, sitim  
 jucundissimè exstingunt: sine prægresso, calore tamen & effe-  
 vescentia, Mineram Ferri, Chalcanti, ac aliorum Fossilium, non  
 acceperunt, quod vel superstes in ipsis sulfuris admixtio compro-  
 bat & frigidioribus quantumvis Acidulis istis hærens. Unde lau-  
 datus HENRIC. ab HEER (Spadacren. c. 6. p. m. 49.) *Vidimus,*  
*inquit, Sulfurearum Aquarum quasdam actu frigere, alia tepere, nonnul-*  
*las fervere, ut vel ovo coquendo, vel quibus deplumandis sufficiant, prout ni-*  
*mirum multum parumve Sulfuris admixti habeant.*

*Therma Caro-  
 lina toptii  
 fera.*

*Fontes spadi-  
 em similis in-  
 dolis.*

*Eorum Mi-  
 nera.*

Proindeque dum de Thermarum alioque Topheo sabulo  
 hic fermo est & fontes isti Spadani actu potius sunt frigidi, eorum  
 tamen mentio nihilominus huc quadrat cum & ipsi sabulosas ad  
 marginem quasdam Scorias exponant & Ochras veluti, juxta  
 HELMONTIUM dum ait, (cap. 4. de Lithiasi §. 3.) *Habent Spa-*  
*dani Fontes spiritum sulfureum manifestè acidum, & Venam Ferri. U-*  
*trumque nempe Embryonatum immaturumque continetur liquaturn in aquâ*  
*simplici. Mox itaque incipiunt ambo vires reciprocas in se mutuo confere-*  
*re. Atque tandem, cum lassatis viribus stiterint actionem suam, condensan-*  
*tur in Corpus lapideum, lagenis se affigens, in formâ Ocre &c. Liquatas in*



aqua simplici mineras Spadanarum dicit HELMONTIUS. Intelligi in minima dispersas, ex pugnâ salium, sine quibus nulla facile in Venis subterraneis effervescencia, aut ebullitio, nulla fa-

*Thermarum  
feror unde?*

cile seminii alicujus metallici à Mineris suis derasis ac depositio in Aquas fit; sed simpliciter quodammodo ad proliciendas in aliquem liqvozem è minerâ crudâ auras metallicas, requiritur

*Ad extractio-  
nem sale opus.*

quoddam sal quod se in intima illius insinuet, destruendoque compagem latentes intus tincturas & activiores particulas eliciat! Cujus rei exemplum speciosum, Clariss. Gallix Chymicus, P. JOH. FABER (apud D. CHRIST. LANGIUM, d. Therm. Carolin. c. 3. §. 12.) nobis insinuat, asserens, dari in quâdam Gallix regione puteum, qui ex Antimonii fodinâ ac minerâ stillantes aquas continuò emittat. Neque tamen has ullis Antimonii virtutibus gaudere, sed bono digestionis successu, ac impunè, bibi ab omnibus ejus loci incolis.

*Aqua minera  
Antimonialis  
innocua.*

Cujus rei causam laudatus FABER hanc pronunciat, quod aqua ista careat miscelâ salis. Probatq; hoc experimento, si enim Antimonium crudum aliquandiu aquæ tepidæ, immò fervidæ immergatur nisi modò vini aliqua pars fuerit admixta non perceptibilem fore ullam in Aquâ ista Antimonii virtutem, sed requieturam, ut ita loquar, in suâ sede. Vinum verò quam facilè penetrat, ratione salis volatilis! Quam integrè sæpe Vegetabilium alioqui virtutes in menstruum aut liqvozem ponit! Hinc graviter inonuisse memini Medicum Seculi nostri ter-maximum, Nobiliss. DN. D. JOH. MICHAËLEM, quoties potiunculæ alicui catharticæ, Corpora Resinosa adderentur meliorem fore eorundem extractionem, si aliquid vini addideris!

*Vini utilitas  
in potiunculis  
purgantibus.*

Ad cujus imitationem, eventus me fecellit nunquam sive in Affectibus Melancholicis, sive serosis, aut aliis procurandis, e. g. in Anomaliâ Cholericâ, præmisso digestivo.

℞. Sirup. Cichor. c. rabarb. ʒss.

Scammon. ʒrat. gr. v.

Resin. gialap. gr. iij.

Aqv. Cichor. Taraxac. Violar. a ʒss.

Cinam. borraginat. ʒij.

Vin. Rhenan. opt. ʒvj.

Tartar. ʒlat. gr. iij. M. pro haustu qui non ita pridem Juveni cuipiam 20. Annorum propinatus à me, alvum de-

cics



cies movit sine intercedente ullâ ventriculi nausæâ, intestinorum-  
 vè qvantillo tormine, aut jactura virium; immò cum notabili po-  
 tiùs assumentis tolerantia ac ἐν Φορίᾳ ! Ex eodemqve fundamen-  
 to Mechochanna melius in infuso, quam formâ pulveris accipi-  
 tur: infertqve SCHRÖDERUS (lib. 4. Pharmacop. §. 448.) spiri-  
 tum purgantem, seu infusum Scammonii spiritu vini Malvatici pa-  
 ratum, sine ullo fastidio aut molestiâ purgare: unde solutivorum  
 istiusmodi spirituum, non infreqvens hodiè etiamnum usus est in  
 Curâ Virginum & delicatulorum, qui à majori dosi abhorrent,  
 Vratislaviæ, Dresdæ, alibi. Novi tamen exempla eorum, qui  
 post assumtum, arbitrio Medici, ejusmodi spiritum, pessimè po-  
 tius habuerunt, insignes ventriculi ac intestinorum dolores, tre-  
 mores artuum, corporis totius imbecillitatem, & plusquam-bi-  
 duanam Anorexiam postea perpesi. Ratio, meo quidem arbi-  
 trio, est, quod partes spiritus purgatrices, per viam præcipitatio-  
 nis in ventriculo aut intestinis ad pristinum Resinæ suæ habitum  
 (si frigidus præsertim aliquis haustus superbibitus fuerit) sunt re-  
 gressæ. Hinc præcipitata Tunicis intestinorum hærent, tormina,  
 jacturam virium suscitant, à quibus syncopas non rarò, convulsio-  
 nes, ac tremores, & nisi maturè abstergantur ferociaqve eorum  
 sopiatur, lethales aut periculosas tandem Hypercatharises seu su-  
 perpurgationes gignunt: cui sententiæ meæ insigne robur addit  
 expertissimi autoritas ZVVELFERI, qui (Append. in Pharm.  
 Reg. Class. 4. p. m. 7.) videatur ut plura hic non addam.

*Spiritus Si-  
 ni purgans.*

Jam, quod auras Thermarum Metallicas, beneficio salis  
 subterranei à mineris suis abrosas vicissim attinet, ut de modo i-  
 dentidem dicatur, quo illæ Tophos ad marginem deponant, no-  
 tare convenit vel consistere eas in substantiâ minus volatili, & so-  
 lutas esse tantum in pulverem impalpabilem, aut atomos, aciem  
 oculi fugientes: abstractâ verò humiditate, magis magisque rur-  
 sus sibi associari, copia in unâ aliquâ parte augeri, fundum petere,  
 coagulatasqve aut induratas ibidem obhærere: vel natura gau-  
 dere prorsus volatili, ac variè in sanguine divagari, donec à causa  
 rursus aliqua figantur & forma fabuli cujuspiam, oculis se sub-  
 mittant. Ad quorum posterius assertum vindicandum HEL-  
 MONTIUS spiritum alium quempiam æqvè fugacem afferre vi-  
 detur & declarare quidem exemplo calculi Vesicæ, eandem ta-

*Modus quo  
 Tophi ad lim-  
 bos Thermo-  
 rum depo-  
 nantur.*

*Paradoxum  
 Helmontii.*



men aut similem prorsus opinionem de generatione Calculorum etiam in Macrocosmo obtinere! Adeoque Autor hic (d. Lithiasi c.3.) ubi ad investigandas causas, quas (§.1.) vocat Radicales, contentorum Urinæ spagyriam, unicum illud intellectus sui speculum adhibuit, credit spiritum quendam Vini contineri in spiritu Urinæ: atque quemadmodum ex spiritu Vini, spiritui Urinæ affuso coagulum album, (§.5.) instar offæ, momento fieri, experientia doceat; ita persuasum sibi habet, similes duos spiritus coexistere in Urina, sibi que cohabitare; concursu verò eorundem facto, momentaneò (§.9.) & ictu oculi calculum exindè generari quatenus scilicet spiritus Vini seu Aqua vitæ (§.13.) coaguletur à spiritu Urinæ.

*Similitudo  
Autoris.*

Si nempe spiritus hi se habebunt forsan, quasi duo Vultures in Aëre pugnantes: qui, ubi unguibus sibi implicantur, fugæ amplioris obliviscuntur, junctimque in Terram lapsi humanarum manuum præda fiunt.

Esse autem associationem hanc HELMONTIUS asserit, non nudam aliquam partium commistionem, sed unitatis indissolubilis connubium, substantialem quandam transmutationem, ac Entis novi productionem ab agente & patiente in Corpus neutrum. Adeoque instar Hermaphroditi potius Ovidiani (lib. 4. Metamorph. fab. 4.) ex duobus in unum aliquod tertium corpus coalescent?

*Duelech Hel-  
montii.*

Istud Corpus ex complexu duorum in Urina spirituum jam enatum, nisi fallor, HELMONTIUS, inaudita Grammaticis voce Duelech vocat, & eo ipso à Natura Cretæ Podagricæ (§.14.) distingvit, quod hæc sensim fiat per modum concretionis & arefactionis partibus videlicet aqueis diffatis, (§.15.) Duelech vero ictu oculi celerius (§.9.) & unico instanti (§.15.) induretur, & spontè conrescat in medio Urinæ (§.14.)

*Refutatur.*

Plura apud eundem HELMONTIUM (cap. de Tartaro non in Potu) videas, huic sententiæ fundata, quam verò non ineruditè refutavit HENR. MARTINIUS, (Anatom. Urin. c. 14. p. m. 252. seq.) qui proinde, si cui lubet, consulatur.

Ut itaque repentinum ejusmodi generandi modum, lapidificos, inquam, istos volatilium spirituum amplexus & connubia-

les



les auras à Tophis Thermarum excludamus, verisimile ut supra etiam innuimus, est, fieri potius per successivum limosarum partium, sed insensibiliter per aquas dispersarum, coalitum, intercedente humidi transpiratione, quæ collectam aliquandiu sabuli materiam tum demum sensibus manifestat, interdum & aliqua salis crystallini cooperatione; quæ indifferenter certè negari nequit, cum sæpè reperti ac geniti, quemadmodum in corpore humano fuerint calculi, qui minimè omnium, aut difficilius certè comminui manibus, vel fricari potuerint; cujus indolis ferè etiam ac quodammodo erant calculi Sperlingiani: ita propè Thermas etiam Tophi, paulò solidiores, aut circa aquas alias simili sabulo fœcundas.

*Tophi Thermarum successivè fiunt.*

Ita Pflaumero teste (l. 2. Mercur. Italic. p. m. 67.) STEPHANUS PIGHIUS scribit, Aquam in campis puteolorum sulfureis manantem, solidescere in saxum & incrustare riparum margines alveumque lapideo tectorio obducere, quia tenuissimos exustarum glebarum pulveres vehat, qui humoris contagione spissentur, ac denique lapidescant; ac ceteroquin apud Aquicolas propè Varium, sed Varronis vicum spectari speluncas & cavernas crebris viarum flexibus horribiles, mille vesperilionum globis habitatas spectabiles tamen & refertas copia insolentium Naturæ operum, & imprimis eorum, quæ olim per rupium hiatus & fissuras stillantes aquæ tenerè ac mirificè efformarunt. Cerni namque multiformes & prægrandes columnas, cerni vastarum arborum ramosos truncos, & monstrorum instar esse Gigantum ac Centaurorum corpora saxea omnia, è stillicidiis nata.

*Aquæ Puteolorum sapifica.*

*Stiria multiformes in Antris ac cryptis.*

Ut conos præterea neque illos fileam, Nitri participes, quales tunc passim in cellis humidioribus magna copia, tum nominatim Vratislaviæ, in Patria mea, sub augustis, quibus pollet, & spaciosis, lateritiis partim saxeis, stupendo robore, arte ac splendore, maximè vero Civium concordia conspicuis, fornicibus alicubi prodeunt, stillandoque deorsum, non diffuunt amplius sed concrescunt, & nitidissima quadam, sed rigida veste circumjacentes fortè paleas, aut stramina incingunt. Quæ submuralia, quas protensas in longum, fornices, non immeritò quis Vratislaviam quendam, uti Romam alioqui, subterraneam dixerit.

*Coni nitrosi in submuralibus Reip. Vratislaviensis.*



*Nitrum fa-  
ctitium.*

Ex stirpibus istiusmodi Nitrum potest elici, pro conficiendo pulvere pyrio; eoque jam pridem ars devenit, ut difficile haud sit, non in officinis solum Pharmaceuticis, aut Chymicis, sed salia crystallina cujuscunque generis, sed vel apud Plebejos passim, in quovis & viliori domus angulo, ex modico terræ cumulo, cineribus lignorum & urina, Nitri copiam producere, facem exempli prælucente hodie etiamnum GLAUBERO, cujus scripta ec- cui sunt ignota?

Attexerem plura hic ex spontaneo cumprimis Naturæ nisu, de succis quamplurimis aliis in lapideam speciem concretis, quorum diligentissimus AMBROSINUS (descript. Musæ. Metal-lici ALDROVANDI lib. 3. c. 1.) meminit, nisi hæc paulò remoti- ora à scribendi scopo essent.

*Confetti de  
Tibuli sive  
Bellaria Ti-  
burtina.*

Unde nec de saxigena maris Fluminum, Lacuum, Rivorum, aut Fontium quorundam vi, nihil de Bellariis, quæ vocantur, Ti- burtinis, addam, seu lapillis Tophaceis candidis, inæqualis ac scabræ superficiei ex saxifico Agri Romani flumine depromptis, nucleosque Amygdalarum, ac semina Fœniculi, vel Coriandri, saccharo obducta, usque adeò exactè referentibus, ut ignari eo- rum degustantes quam sæpius fallantur: à cujus figuræ similitu- dine proinde Itali, Confetti de Tibuli, nos Bellaria Tiburtina di- cimus, à Cl. OLAO WORMIO etiam alioqui (Musæi l. 1. f. 2. c. 6. p. 52. & Ante-laudato ALDROVANDO (lib. 3. Mus. Metall. cap. eod. p. 278.) quædantenus descripta:

*Corpora Ga-  
ria petrefa-  
cta.*

*e.g. Animalium  
ac planta-  
rum partes.*

Nihil de seminibus aut fructibus aliis, caulibus, foliis, radi- cibus, verè in lapidem conversis, cujusmodi rerum plurimas, nec non Animalium variorum, & inter ea Hominum etiam, diversas partes, capita, inquam, brachia, inguina, pedes petrefactos, unà cum aliis stupendis Naturæ ac Artis operibus inexhausti precii & splendoris, Venetiis, in Palatio Nobilis cujusdam per singularem ac iteratam gratiam Illustrissimi ibidem, Amplissimi que Sena- toris, & eo quidem tempore Serenissimæ Curiæ ADVOCATO- RIS, DN. JOH. FRANC. LAURETANI, inexplata animi volu- ptate videre mihi licuit; in palatio, inquam, rari exempli æde, quam proinde non Venetiarum solum, sed vel Lombardiæ totius Minervale quoddam aut Palladium dixerim.

Nihil



Nihil porrò de ipsis Homīnibus integris Petrefactis addam, nihil de Lignis lapideis, Coraliis semisaxeis jam & partem adhuc lignosis: nihil de Fungis lapideis, quales ex Italiā allatos tum Excell. Dn. MAURITIUM HOFMANNUM PROFESSOREM Noricum Amplissimum Amicumq; ejus, profundissimæ eruditionis Virum, Dn. D. VOLCKAMERUM, tenere suspicor, tum ego duos in supellectili meâ teneo, alia vice plenè describendos: aut ex TORELLI SARAYNÆ Historiâ Veronensi Italicè conscriptâ ALEXANDRO ab ALEX: (lib.5. gen. Dier:) FAB. COLUMNA (observat. Aquatil. & Terrestr. cap. ni fallor 21. p.44.) ALDROVANDO (lib.4. Musei Metall. c. 62. p.819.) aut aliis, de Echinis videl. marinis, paguris, stellis piscibus, cochleis, ostreis, mitulis, tellinis, aut spinis piscium, intra montes olim, & forsan jam prisco Diluvii tempore eò delapsis, posteaq; intercedente longissimo seculorum tractu in lapidum quemadmodum naturam, sic duritiem mutatis:

*item Homines integri.*

*Testacea, & Crustacea varia.*

Nihil de Piscibus, Canibus, Lacertis, rebusvè aliis, miraculosè propemodum, aut insolenter certè, intra media lapidum viscera repertis, ut obscurum, ac grave dictu sit, quâ viâ ac ratione, in ipsa, ut ita dicam, Marmorum viscera, & occlusos eorum undiq; parietes, devenerint, prout narrantur conchæ aliœq; etiam ac genuinæ ostreæ, medio marmori inclusæ, posteaq; in Thessaliæ ac Hæmonix lapidicinis adinventæ, & anguis integri corpus tempore Urbani VIII. Pontif. repertum Romæ, & corpora alia, quorum speciosum Catalogum dabit indubie Magni Mundus subterraneus KIRCHERI:

*Animalia intra medias petras reperta.*

Essetq; incidenter proinde etiam aliquid de muscis, apibus, formicis, culicibus, vermiculis, lacertis, araneis, graminibus item ac stipulis, succino inclusis aliquid monendum; de quibus singularem opinionem vide sis apud celeberr. D. JOH. DAN. HORSTIUM (observat. Anat. 2. p. m. 10.) existimantem, non inesse vere talia Succina, sed apparere tantum, & orta esse ex peculiari impressione cœli, cujusmodi sive phasæ sive vera corpora certè rariora sunt, nec observata hætenus in succino nostro VVittenbergensi, VVittenbergensi inquam. Nam & hic, quo in loco hæc scribo, vivente adhuc Conjugis meæ Avo. Fami-

*Corpuscula Succino inclusa;*

*Succinum VVitteberga ebulliens,*



geratissimo SENNERTO, sub renovatione valli, in fossâ, procul ab omnibus locis maritimis, in grato Albis confinio, reperta fuit Terræ Vena arenas veluti tenuissimas ebulliendo projiciens, cum quibus simul exiere quædam Succini frusta, translucida, aurei coloris, atq; si flammæ adhibeantur, æqvè ut Succinum Prussiacum, inflammabilia, & amicum spirantia fragrorem.

Ex quibus exemplar quoddam teneo ex liberalitate Honoratissimi Civis mei, JCTI Excellentissimi Dn. D. CHRISTOPHORI BRESLERI, Museo gratâ Naturalium varietate in his locis clari: aliudq; frustulum, similis profapiæ ac indolis adferro quod noviter etiamnum ex eâdem venâ erutum mihi donavit Laudatissimus Electoralis hujus Urbis Capitaneus, Dn. ERASMUS EGERLANDUS. Ut frustra amplius sit, pulcerrimi istius Bituminis Natales unice in undis quærere velle, cum ne Succinum quidem Prussiacum aliunde, quam Terrâ nasci videatur, innuente AMBROSINO (lib. 3. Musei Metall. ALDROVANDI, c. 18. p. 407.) dum ita ait: *Inter alios Autores nobis magis arridet Erasmus Stella, in libro de Borussia Antiquitatibus, qui divulgavit, è limo quorundam Montium, Sole operante, fluitare, & in herbido, atq; algido Solo, his montibus subjecto, densari, & Oceano illic effervescente inde rapi, & in proxima litora propelli. Indicium autem hujus rei esse tradit, quoniam ex solo interdum eruitur; quod cum molle & lentum adhuc sit, loci incolæ mari immergunt, cujus ope postmodum lapidescit.*

*Prussia cur  
ferax succini?*

*Regressus ad  
Historiam Cal-  
culorum Sper-  
lingii.*

Sed missis tandem his omnibus, missâ ampliore calculorum in Macrocosmo historiâ, imprimis quod talium propediem mentionem facturus sum in Lithologiâ meâ Curiosâ, ad æqvè curiosam, sed non sine mœrore, historiâ mortis & calculorum SPERLINGII revertamur.

*Decubitus &  
Agon Sperlin-  
gii.*

Doloribus itaq; Lumborum, & molestis Dorsitorminibus, concurrente mingendi difficultate ac tarditate per aliquot retrò annos vexatus, corpore verò ceteroquin robusto ac valido, cui proinde etiam nimis ferè confidebat, Cl. SPERLINGIUS, medicaminum assumendorum impatiens, circa Julii Mensis finem, superius dicti Anni 1658. â plurimis amplius se cohibere, quam maximè vellet, nequit, sed incassum quæsitâ ampliore obam-  
bula-



bulandi libertate, victusq; mali vi, tertia quasi ante obitum hebdomade, Lectulo se, ultimo Mortis suæ Proscenio, submitit, agitantibus ipsum non rarò, ut calculosis fieri assolet, & defatigantibus vomitibus, ratione ventriculi, in consensum tracti.

Hinc nec tantillum detinuit penes se, quodcunq; ex Pharmacopolio allatum, offerri sibi tandem permittebat.

Urina toto decubitûs tempore obstructa mansit, nec destillare ex Renibus quicquam ejus potuit, ob Ureteres Sabulo infarctos.

Exacerbabantur dolores, superveniebant cum Febri vigiliæ, quæ innocens corpus usq; ad ultimum ferè vitæ Articulum, convulsionibus finitum, excruciant.

Acquievit tamen paulò ante hunc, & placidè postea animam exspiravit, quam precibus quotidie, & piis suspiriis sancto ex hac vitâ & irremeabili itineri præpararat. *Ejusdem Mors.*

Ad conciliandum super hoc mœstissimæ viduæ solatium, ut ipsa incurabilis morbi reliquias ac testem, Calculos videret, quæsitus à me, in aperto defuncti corpore, fuit mortiferæ causæ locus. Atq; sic, dum manus admoverem, integumenta abdominis, muscoli & viscera plerâq; rectè satis se habebant. Quibus proinde ad latus revolutis, factisq; ex arte quibus opus erat, ligaturis, ne dextræ ad partem affectam tendenti quid obesset, abactôq; à Renibus involucro confestim iidem aparuerunt penitus inflammati, qui sic radices febris fuerant. Nisi enim fallor, omnem inflammationem internam Febris sequitur, non quidem tam præcisè ob vapores, qui ex effuso in partem inflammata, ibiq; putrescente sanguine cordi communicentur, illudq; calefaciant, quam ob impeditam potius sanguinis circulationem & spiritus exæstantes, cujuscunq; certè repaguli prodigos: Unde hi objecto semel obice, confestim retrò ruunt, assumtoq; in furoris societatem sanguine, imprimis quando hic jam est in viâ ad putredinem, quemadmodum universum corpus Febre, sic cerebrum præterea ac simul vigiliis insuetis torquent. *Apertio Caudæ Seris.* *Causa Febris in inflammationibus internis*

Quæ certè à B. SPERLINGIO non abfuere, præsertim postquam fervidus iste Renum Tumor augmenta sua sumsit.

Increverat verò is adeò, ut illorum figuram etiam, ac eternam *Renum Figura varia.*



ternam dimensionum determinationem, quodammodo mutata cerneret.

Hæc, ut notum est, per naturæ leges, instar Phaseoli Indici, in Adultis, lævi & planâ superficie describitur: in foetu ac recens natis tuberosior parumper est, &, quemadmodum intus glandulis, sic in ambitu etiam quibusdam eminentiis distincta, quasi plures Renelli in unum globum in alterutro corporis latere sint congesti, ob plures videlicet illas, quas dixi glandulas, quibus Renes, etiamsi obscurius, (non excluso tamen hic proprio parenchymate, integrantur. Censetq; hoc Foetui proprium Anatomicorum nostri seculi Alpha & Omega Th. BARTHOLINUS (Cent. 1. histor. Anat. 14. pag. 29.)

*Multitudo Renum in Lutrâ.*

Ego verò non obscure, sed sat evidenter, nec glandulosa corpora, unum aliquem renem constituentia, sed singulos ac numero distinctos Renes non semel observavi in dissectis Lutrâ (German. Fisch. Ottern) complicari, quatuordecim in utroque latere, & connecti sibi, velut in botro uvæ sibi per singulos peduncululos connectuntur, singulis Membranis, Venis ac Arteriis emulgentibus.

*Præternaturales Renum, ob Inflammationem, protuberantia.*

Et vicissim, in Exuviis SPERLINGIANIS, unus quidem tantum utroque, prout per Naturam humanam decet, Ren observabatur, elatior tamen uterque, in aliquibus superficie sive partibus, sic, ut nisi Renes plurimos complicatos, uti de Lutrâ retuli, extraordinarias tamen quasdam, & arcuatas veluti eminentiæ notas, ob summam, quâ distenti erant, inflammationem, referrent, non obstante, quod CL. LOESELIIUS alioqui (Scrutin. Ren. Inciso 1. artic. 2. §. 7. p. m. 14.) ARISTOTELEM repudiat, qui (lib. 3. d. Partib. Anim. c. 9.) ait: *Hominum Renes Bubulis similes sunt, & tanquam compositi ex multis renibus exiguis: neque aquabiles, velut Ovium renes: nam tuberosam Renibus figuram in homine nos tribuimus: nam loquimur hic de statu præternaturali, contra quem à Naturali non valet Argumentum. Immò in Naturali etiam distinctim procedendum, ratione Ætatis, uti modò ex BARTHOLINO dictum est.*

Sed quænam jam facies interna erat Renum Sperlingianorum? nam hujus lustrandi gratiâ imprimis Sectio instituebatur.

Illo



Illorum uterq; , quod admirandum , omnimodè repletus erat Calculis innumeris , minimis , mediocribus : tribus etiam prætereà maximis , sic , ut internum latus omne , ac finum , pelvimq; , quam vocant , seu aperturam , Renibus æque , ac Ureteribus communem , penitus occluderent.

*Descriptio  
Calculorum  
Spérlingii :  
Non in reni-  
bus solum.*

Ureteres ipsi etiam à suo circa Renes exortu , usq; ad Vulvam vesicæ immensi arenularum copiâ , & farciminum instar extensi & turgidi videbantur , ut irritus tandem fuerit quotusvisq; Naturæ , sive in promovendâ Urinâ , sive Renum calculis , minoribus quamtuncvis , conatus , quem sanè , non sine insigni doloris sensu unquam exorsa est ; sed quotiescunq; hos locomovere aggressa est , visum sibi retulit B. SPERLINGIUS , ac si aliquis cultro acuto vulnus profundum , secundum longitudinem Lumborum ipsi infligeret ; tractusq; hos identidem à summâ illorum parte , usq; ad regionem vesicæ , repetitos daret ; unde colligi potest summa doloris ferocia , & atrocitas , summa totius corporis inquietudo , quâ Optimus Vir decubuit , ut subsequæ tandem mortis exemplo ipse etiam docuerit , verum esse , quod scribit ANDR. LAURENTIUS : ( præfat. oper. Anat. p. m. 5. ) *Reperiuntur in corporibus nostris fodinæ , è quibus Metalla & Lapides eruuntur , non ad edificandam , sed diruendam domum.*

*Sed totâ eti-  
am Ureterum  
cavitatē.*

Placuit proinde , majoris evidentix ergò , Calculos istos , mortis SPERLINGIANÆ autores , ære delineatos dare , accommodato ordine figurarum , ad ordinem inventionis.

*Iconum , ære  
incisarum ex-  
plicatio.*

Primus itaq; , figurâ I. delineatus , sat grandis , figuræ ferè triangularis , sed , circa basin , latioris , quasi montana quæpiam repræsentet , superfici ei inæqualis & asperæ , coloris , ut reliqui omnes , ex albo flavescentis , consistentiæ non fungosæ aut spumæ , sed compactæ magis , & durioris , in cavitate Sinistri Renis hæsit , correspondens illi non parum , quem in muliere quâdam visum delineat Tulpus ( lib. 2. Obs. Med. 45. ) Atq; hic noster , ad æquilibrium vocatus , dum humidior adhuc esset , & magis recens , Drachmas Medicas quasi tres pependit ; replevitq; cum altero sibi accumbente minore , calculisq; quamplurimis aliis minoribus totam modò-dicti Renis Sinistri cavitatem.

*Figura I.*



*Fig. II.*

Secundus, priore duas Tercias minor, figuræ ferè orbicularis, sed oblongæ ac tuberosæ, atq; in se spectatus, ipse etiam sat grandis ac damnosus, in eodem Sinistri Renis thalamo, ( ingratus corporis hospes ) recumbebat, ne quicquam deesse videretur ad absolutam aliquam Urinæ interceptionem.

Illius icon exhibetur in Figurâ Tabulæ secundâ. Pondere primùm æqvavit circiter drachmam unam Medicam; nunc, tractu Temporis exsiccatus ( memoriæ causâ enim ipsum asservavi ) vix dimidium ejus pendet, ob deperditionem humiditatis, quæ antea gravitatem ejus augebat.

*Fig. III.  
Calculus stupenda magnitudinis.*

Tertius omnium maximus est, & reliquorum veluti Pater, stupore & admiratione dignus, quia similes alios aut majores annotatos vix reperiatis, aut observatos, stante hominum memoriâ, tribus quatuor exceptis, qui apud JOH. GEORG. SCHENCKIUM ex observatione KENTMANNI, CAMERARII, ac suâ delineantur ( cap. 14. Lithogenes. p. m. 40. seq. )

Totam ille Renis dextri capacitatem occupabat, & nihil non in eo connotabatur memoratone dignum, si ve molem ipsius, & pondus, si ve figuram, & processus, si ve situationem tandem consideres.

De magnitudine jam quodammodo est dictum; corpusq; ipsius, seu maxima ejus crassities, ad nucis juglandis mediocris molem accedebat.

*Ejusdem pondus,*

Gravitate, & inclinatione ad Centrum Mundi, postquam ille ad æquilibrium reductus, accessit ad pondus drachmarum quinque Medicarum, & paulò amplius.

*Figura, processus,*

Figuram processus crassissimi deformem reddidere, ex quibus duo breviores, in eodem Calculi latere, dorsum Renis spectante, sibi oppositi, ut ex figurâ III. patet, spaciis



spaciis insignioribus Caruncularum Papillarium conspicebantur implantati: tertius verò, isq; longior & curvus, zostrum Avis alicujus æmulans, pelvim, seu Ureteris principium obstruebat, eiq; , veluti cuneus quispiam insertus, non permisit quicquam ad Vesicam pertransire, ne guttam quidem.

Figurâ quartâ Calculi plurimi minores, diversi inter se ponderis, figuræ, ac molis exhibentur: ex quibus alii rotundi, & pisces similes, alii grana milii referentes, alii majores, & irregularis figuræ, alii oblongi ac mediocres, alii tandem arenularum minimarum instar, quemadmodum residua in renibus spacia, sic maximè omnium Urinales meatus, inter renes & vesicam, oppilabant, ut farciminum par quis dixerit, si cui inscio Ureteres hi objecti essent.

Rarissimum profecto fuit hoc, & commemoratione summè dignum.

Ab illorum copiâ & asperitate factum, ut auctum indies fuerit quoddam etiam Exulcerationis periculum, unde B. SPERLINGIUS, ubi contentiùs quandoq; ante decubitum ambulavit, discussurum se existimans, ope motus, præsentaneas Mortis suæ causas, non tam profuit sibi, pauxillum arenæ evacuando, quàm obfuit, mictionis cruentæ speciem incurrendo, ob attritas à calculis per agitationem partes. Etiam si enim calculi tam renum, quàm Ureterum, dum eximerentur, mucò quodam & lentore purulento obducerentur, usq; adeò tamen scabritiem suam ac asperitatem non amiserant, quin angulis suis ac eminentiùs lædere partes molliores potuissent; ut taceam, quod per intempestivum istiusmodi motum limosa sabuli colluvies prorsus tandem est compacta, ut nulla emissendæ Urinæ spes ampliùs superesset.

Hinc

Fig. IV.  
Calculi Ureterum.

M. etus cruentæ  
ti causa.



*Ischuria diu-  
turnioris  
exemplum.*

Hinc mirum non est, Vesicam alioqvi salvam à nobis visam fuisse, Humoreq; seroso ac Lixiviali prorsus destitutam, ob totalem, inquam, infarctum Renum ac Ureterum.

*Mortis in ea-  
dem progno-  
sticum.*

Hoc verò admirationem præbet, in tantâ Urinæ suppressione, & necessario indies Alimentorum, utut paucorum admodum, & exilium accessu, mortem tot ac tantas tenuisse moras, quandoquidem JOH. DOMINIC. SALA, alioqvi multiplicis experientiæ Medicus, semel, non amplius, toto vitæ suæ spacio, Urinam quindecim diebus in viro quodam suppressam meminit, venis ad pollicis magnitudinem tumefactis. Secus, urinam supra quinque vel sex dies nunquam recordatus est retentam, monente JOH. RHODIO ( Cent. 3. Obs. Medicar. 28. ) Sed ægri plerumq; , nisi ante septimum diem mingant, moriuntur, ob viscerum à regurgitante sanguine oppressionem, febris accensionem, & ultimam virium suffocationem.

*Valvularum  
in prohibendâ  
suffocatione  
impotentia :*

Nam, ut coronidis loco hoc addam, jam dictæ sanguinis regurgitationi in talismodi obstructionibus renum insignioribus resistere queunt valvulæ, quandoquidem

*earundem in  
Trunco Cavæ  
absentia,*

I. Nullæ dantur in Trunco Venæ Cavæ, quâ parte Emulgentes enascuntur, si Aquapendenti, Valvularum seu Ostiolorum in Venis primo ( ut autor sibi persuadet ) inventori ( Tractat. d. Venar. Ost. Tab. 3. ) credimus.

*Et in ramis  
Emulgentibus  
præsentia.*

In Emulgentibus tamen ejusdem Venæ Cavæ ramis observata ostiola à se, eminentissimi quidam Regni Anatomici Proceres attestantur, ea videlicet venarum parte, quâ bifurcatim veluti Cavitatem Renum hæ ingrediuntur. Vide incomparabilem Medicorum Her-

metem



metem ac Polyhystorem , D. CONRINGIUM ( de Generat. Sangu. cap. 27. p. m. 194. ) Ingeniosissimum HARVEUM , ( d. Motu Cord. cap. 13. p. m. 55. ) Diligentissimu LOESELIIUM ( Scrutin. Ren. Incis. 1. artic. 1. §. 9. pag. 7. ) ac alios qvi unanimi ore visas ibi à se valvulas fideliter affirmant. Excellentiss. e contra Vir , & Anatomicus oculatissimus Dn. D. ROTFINCIUS ita ait; ( lib. 1. Dissertat. Anat. c. 27. pag. 939. ) *Valvulas exiles in Venis emulgentibus à Vesalio in Examine , Baubino in Theatro , & Spigelio in historiâ suâ adnotatas observare nobis non licuit. Riolanus ita exiles judicat , ut , si non vera valvula , tamen quid valvula simile fiet. Harveani contrarium servant situm , latiori nempe & patente Cavam , acuminatâ & clausâ parte Renes respicere.*

II. Si quammaximè darentur , apicibus ac limbis suis tamen non obsisterent , qvia eosdem earum processus & semicirculos , ad non impediendam , in statu etiam sano , sanguinis circulationem , non extremitatibus venarum , sed cordi potiùs obverterent , ut ita sanguis è renibus non adversum eas , sed supra anteriorem earum superficiem , flumine , ut sic prono transferretur. Quo ipso autem intactam nihilominus velim Harveanorum , si qvi contrarium statuunt , auctoritatem. Et quomodocunq; se habeant ostiola in Venis Emulgentibus , sive à renibus averfa , sive iisdem obversa sint ; Regurgitationis ratio , qvoad præsentem de Calculis discursum , potius in Arteriis qvarenda est. Verum enim verò neq;

III. Arteriis emulgentibus , neq; aliis in corpore facile necessariâs Natura agnovit valvulas , si ante-laudato

*Absentia Siccissim in Arteriis.*

AQUAPENDENTI ( l. d. ) credimus , cum qvo cele-

D

berri-



berrimus D. CONRINGIUS ( de Generat. Sang. c. 27. p. 201. ) & PRIMIROSIUS ( contra HARVEUM, c. 12. p. m. 93. ) conferatur. Unde non datis valvulis, in progressu Arteriarum, planè neq; per eas dabitur Regurgitationis impeditio.

IV. Si quamaximè etiam in Arteriis darentur, in insigni tamen ac diuturnâ aliquâ Inflammatione, quod palmarium jam est, Sanguinem, quò minus is regurgitet, cohibere vix valerent, quia quò diutiùs hic fertur per Arterias ad partes, nec per venas tamen redire potest ad Cor, eò magis magisque Arteria inturgescit. Turgescente Arteriâ, annatum eidem Valvularum latus deducitur cum ipsâ, & liberum vicissim earundem latus ab opposito interno Arteriæ pariete abscedit, sic, ut occludere eandem plenè non possit, sed cogatur admitte-

*Valvula ex-  
tensis nimium  
Venis non co-  
extenduntur.*



re qualemcumq; Sanguinis regurgitationem : quam rem libet tali exemplo ex mente OL. RUDBEKII ( In- fid. Struct. membr. 12. pag. 127. ) declarare : Fiant duo canales, prout hic in appositâ Figurâ A. & B. videre est, annexasq; intrinsecus habeant quasdam Valvulas, ejusdem magnitudinis, quarum pars fixa esto C. libera verò & mobilis D. Postea in Canalis A. partem inferiorem E. liquor aliquis mediocri impulsu immittatur, sic valvulae attollentur, venam occlu-



occludent, & ampliorem liqvoris adscensum prohibebunt: Vicissim verò, alterius canalis B pars superna F. vinculo aliquo stringatur, & à parte inferiore G. similiter liqvor quvispiam, sed vel majore violentiâ, vel paulò diutiùs, sursum impellatur: Sic canalus totus, usq; ad ligaturam, amplior evadet, limbiq; valvularum C. eo ipso, quo fixi non sunt, non etiam coëxtendentur, sed à latere canalis opposito D. recedent, atq; sic liberum liqвори ad superna aditum concedent.

Quam opinionem, immò Mathematicam dico demonstrationem egregiè confirmat supra-laudatus CONRINGIUS (l. d. pag. m. 195.) his verbis, quæ sanè merentur adscribi: *Plerisq; in locis, inquit, si cogas sanguinem minores Venas versum fluere, ita ille à valvulis passim sistitur, ut ne vi quidem guttula ejus aliqua præterlabatur. Hoc ipsum verò non tantum in corporibus per Anatomen apertis, sed & in vivis, integrisq; est deprehendere, si brachia cum primis vinculo constrinxeris iis, quibus vena magis sunt conspicua. Sanguis enim valvulis conclusus, quâ parte quasi tubercula producit, & geniculos, nec suâ sponte, nec retrò pressus trans valvulas etiam in vacuum venæ spaciū solet concedere. Hoc ipsum clariùs liquet in corporibus dissectis: nullibi enim non per omne corpus hæc valvularum est Natura. Non tantum autem non sanguini, sed ne flatui quidem patet via, si venam versus minores ramos inflaveris: etiam hic enim sistitur, nisi tandem ita præter naturam dilates venam, UT AMPLITUDINE VINCAT VALVULÆ CORPUSCULUM.* Et rectè idem de Statu præternaturali partium colligere est, quod malè alioqvi, tanquam de Naturali, PRIMIROSIUS Harveo objicit ( de Motu

*Suffragium  
Cl. Conringii*

Sangu.



*& Primirossi.*

Sangu. cap. 13. p. m. 93. ) *Si copiosius & celerius Sanguis affluit, quàm redire potest, fiet, ut tandem spacium venæ intra Valvulas plures, seriatim dispositas, comprehensum, affluentis Sanguinis ubertate distendatur, unde periculum ruptionis impendat, ut in habitu Athletico.*

*Conclusio historia calculorum.*

Atq; hæc hæctenus fuit series Morbi, hæc non obli-  
viscenda facilè domus SPERLINGIANÆ, dicam & A-  
cademiæ totius VVittebergensis, cui Clarissimus Vir  
Rectoris titulo tum præerat, Tragœdia, quam tali Epi-  
logo claudebam:

*Epigramma funebre.*

In scopulos quando mutatum est corpus At-  
lantis,  
Sustinuit vastum Claviger inde Polum.  
Calculus & nostrum nuper mutavit Atlantem,  
Herculeæ desunt sed tamen usq; manus.  
Marmor es, ô Lector, saxoq; rigentior omni,  
Pan sophiæ miseras ni gemis ergò vices.

